

Memahirkan KEBAIKAN



Tiga artikel kolom V.I.P. sebelum ini sudah mengupas tentang keperluan bersegera kepada kebaikan, kefahaman meletakkan kebaikan sebagai keperluan hidup, bukannya pilihan dan penanaman konsep dengan merasakan diri tetap penting untuk berbuat baik.

DOA

DOA PERLINDUNGAN DIRI

أَعُوذُ بِاللَّهِ وَقُدْرَتِهِ مِنْ
شَرِّ مَا أَجِدُّ وَأُحَاذِرُ

MAKSUDNYA:

"Aku berlindung kepada Allah dan kekuasaan-Nya daripada keburukan yang aku hadapi dan aku bimbangkan."

(Riwayat Muslim)

TARGET VIP

Kebaikan luar biasa dibina dengan membiasakan kebaikan.



Ya, memang kita sudah pun melazimi kebaikan setiap hari. Yang sudah dibangunkan, alhamdulillah. Namun, yang masih belum dilakukan perlulah didirikan agar menjadi kebiasaan. Biasa-biasakan.

Terkadang kebaikan yang biasa dilakukan tetapi terlupa atau sengaja ditinggalkan membuatkan diri dihurung rasa bersalah. Perasaan inilah sebuah nikmat keindahan iman kerana merasa berdosa disebabkan meninggalkan kebaikan, bukannya kemungkaran!

Nabi s.a.w. pernah bersabda: "Sesiapa bersukacita dengan kebbaikannya dan berdukacita dengan keburukannya, ia adalah Mukmin." (Riwayat Ahmad dan al-Hakim)

Subhanallah. Bukankah ada beza Muslim dengan Mukmin?

BAIKI DIRI, SERU YANG LAIN

Kita sendiri boleh merasakan mudah dan nikmatnya berbuat kebaikan. Segalanya

bermula daripada kehendak hati iaitu niat. Bila pembinaan dalaman kukuh, maka tindak tanduk luaran akan menjadi bersungguh-sungguh. Jika hati mahu, segalanya menjadi mampu.

Yang paling penting, mulakan dengan diri sendiri. Bangunkan sesuatu dalam daerah sendiri. Lihat apa yang mampu diberi dengan kemampuan sendiri, kita akan termotivasi sendiri.

Semak diri, adakah sudah menitipkan nasihat atau percakapan yang positif? Sudahkah status di laman sosial menjadi bacaan dan perkongsian yang luar biasa dan tergolong dalam tinggalan yang baik-baik? Sudahkah indah akhlak yang kita persembahkan setiap hari?

Manusia fitrahnya suka akan kebaikan. Cuma kadangkala kita tewas pada bisikan nafsu dan hasutan syaitan. Jadi, kalah pada yang salah. Namun, jalan berbuat baik sentiasa ada.

Konsep perbaiki diri dan menyeru orang lain menunjukkan kita punya kewajipan memperelok kualiti diri dan tidak terlepas untuk mempengaruhi masyarakat. Konsep ini berjalan seiringan.

Inilah indahnya Islam. Kebaikan itu dibina secara berkumpulan, bukannya bersendirian. Menuju Allah itu perlu berpimpinan, bukannya berjalan sendiri.



Pelan Tindakan

Setiap kejayaan perlu ada pelan tindakannya. Ayuh semak dan senaraikan bentuk-bentuk kebaikan lain dalam pelan tindakan diri berikut. Semoga kita menjadi yang tidak sedar dengan kebaikan yang dibuat.

SAMPAI BILA-BILA

Sampai bila kena berbuat baik? Jawapannya berterusan, sampai bila-bila. Buatlah kebaikan sehingga tidak sempat merasa lazat dengan dosa dan maksiat. Biarkan penat dalam kebaikan, bukannya keburukan.

“Tunjukkanlah kami jalan yang lurus.”

Bukankah ayat ke 6 dalam *ummul furqan* yang disebut berulang kali ketika solat itu mengajarkan kita agar sentiasa memohon kebaikan lain dengan kebaikan yang sudah dibuat (solat)? Semoga kebaikan yang telah dilakukan membawa diri untuk membesarkan Illahi, bukannya berasa kagum pada diri.





Ayat ke 5 sebelum itu pula menyebut;

Engkaulah yang kami sembah dan hanya kepada Engkaulah kami memohon pertolongan.”

Ya, melakukan ketaatan dan kebaikan itu menjadi simbolik penyerahan diri dan akur pada arahan-Nya.

Ibarat adab seorang hamba kepada tuannya. Patuh dan taat pada apa yang disuruh, kemudian baru memohon pertolongan. Dan sungguh tiada doa dan harapan yang paling utama melainkan didorongkan dan ditetapkan langkah kepada jalan kebaikan.

Bukankah melangkah dan berjalan dalam daerah kebaikan memberi harapan kepada diri? Moga-moga terpilih menjadi VIP di akhirat kelak pula, insya-Allah. **Q**

PERANAN DIRI KEPADA...	BENTUK KEBAIKAN	DALIL
 DIRI SENDIRI	<ul style="list-style-type: none"> Mendalami ilmu. Meninggalkan perkara yang sia-sia. Berakhlak mulia (menyebarkan salam, berlemah lembut, baik hati) Menjaga solat. 	<p>“Kelebihan ilmu lebih aku sukai daripada kelebihan ibadat.” (Riwayat al-Hakim)</p> <p>“Sesungguhnya Allah menyukai sifat lemah lembut dalam setiap perkara.” (Riwayat al-Bukhari & Muslim)</p> <p>“Wahai manusia, ucapkanlah salam, berilah makan, tunaikanlah solat pada waktu amalan, nescaya kamu memasuki syurga dengan selamat.” (Riwayat Tirmizi)</p>
 IBU BAPA	<ul style="list-style-type: none"> Berbuat baik. Memelihara perasaan mereka. 	<p>Jabir bin Abdullah meriwayatkan, seorang lelaki berkata: “Wahai Rasulullah, sesungguhnya aku ada harta dan anak. Tetapi bapakku hendak menafkahkan hartaku.”</p> <p>Baginda bersabda: Diri dan harta engkau kepunyaan bapakmu. (Riwayat Ibn Majah)</p>
 JIRAN	<ul style="list-style-type: none"> Memenuhi jemputan. Melapangkan setiap bantuan yang diminta, bukan menyusahkan. 	<p>“Jiran yang terbaik di sisi Allah ialah mereka yang paling banyak berbuat baik kepada jirannya.” (Riwayat al-Bukhari & Muslim)</p>
 TEMAN	<ul style="list-style-type: none"> Menasihati ketika diminta. Menjaga aib. Menegur jika tersilap, bukan membenarkan. 	<p>Seorang insan ialah terikut-ikut dengan adat kebiasaan sahabatnya. Maka hendaklah kamu melihat dengan siapa kamu bersahabat.” (Riwayat al-Tirmizi & al-Hakim)</p>